

T2726.2/1923

(4)

91

大明英宗睿皇帝實錄卷之九十一

正統七年四月辛卯朔享

太廟○遣中官祭司龜之神○命陝西管糧官勘實

各府衛軍民年遠借過官糧果逃故貧難不能償

者蠲免其食足之家令見任及經考滿官併督秋

成償官或本色或折收銀布絹考滿官督完方許

給由從鎮守陝西右僉都御史王翱奏請也○給

事中楊信民奏通州直抵南京沿途委官收糧收

鈔住居日久不免役用軍民起造房屋侵種民田

乞俱如巡按監察御史例一年一替奏下戶部議

揚州等處收鈔官宜如所奏其附近通州等處收
糧并各馬房監收草料官仍三年一替從之○壬
辰廣西忠州官族黃琳憑祥縣官族李青都康州
官族馮清向武州頭目唐玉等來朝貢馬賜綵幣
等物有差○陞雲南都司斷事司斷事王彥為澂
江府知府從都察院右僉都御史丁璿薦也

上以河南山東并直隸鳳陽真定等府去年蝗災慮
有遺種復生直隸命侍郎等官往督軍衛有司山
東河南遣人馳驛齎文令三司各委堂上官偏歷
大所屬設法掘燎毋遺民患○癸巳封靖江王府故

輔國將軍贊倫第十女為洛清鄉君配戴瑄命瑄
為宗人府儀賓賜誥命冠服等件○甲午命建
獻陵

景陵宰牲亭○勅鎮守松潘都指揮僉事王杲高廣
曰王者一視同仁固無間華夷朝廷命將守邊惟
嚴兵備固封疆禁暴亂以安良善耳前命趙得趙
諒同守松潘縱私營利枉害良善致變外夷已寘
重典命爾二人代之近者粟谷等寨蠻夷劫糧夫
殺官軍若兵備嚴撫綏善豈有此失又聞爾等欲
遣人入番能不侵擾啓釁以若所為皆殺身之道

與諒得何異勅至宜革心改過處以至公務使遠
人畏服疆場靖寧以副委任否則諒得之監不遠
國家之法不爾宥悔無及矣○命山東兗州府曹
縣知縣范希正江西袁州府分宜縣縣丞李忠浙
江温州府樂清縣主簿吳瓊直隸寧國府南陵縣
典史揚意各復任希正等俱九載任滿邑民保留
巡按監察御史等官覈實以聞故有是命○免山
西平陽府所屬州縣去年旱傷糧六十五萬三千
石有奇草一百三十萬七千束有奇○給萬全都
司東門等驛站馬一百一十五疋○徙福建武平

縣永平寨巡檢司於丘留背寨以舊署地僻而新
徙地衝要故也○鎮守陝西都督同知鄭銘奏西
安府所屬州縣去年秋冬及今春不雨鞏昌平涼
臨洮鳳翔慶陽延安等府今春亦不雨田苗枯槁
人民乏食已分委布按二司官設法賑濟謹具以
聞○巡按直隸監察御史程富奏京衛武學教諭
黃墀言語妄誕動止輕浮及考試不稱又抗拒不
服宜罪之

上曰墀為人師範廼如此姑宥其罪仍罰俸一月明
日墀亦富擅凌辱教官等事奏

上曰塚已蒙宥罪乃據拾御史不准令禮部記其過
○乙未武安侯鄭能卒能廬州府合肥縣人宣德
十年襲父亨爵於五軍營督操至是卒子宏嗣
丙申夜有流星大如雞彈色青白尾跡有光出七
公北行至文昌後一小星隨之○丁酉
太皇太后聖節
上率親王上壽免命婦朝賀賜文武百官宴○琉球
國中山王世子尚忠遣使臣達福期等進表貢馬
及方物賜宴并賜綵幣等物有差○戊戌
上始束髮祭告

奉先殿○賜文武百官宴○山西太原左衛卒張敬
言頃者山西獲賊官校之陞多非實功有所司受
賂陰與擒獲者有私賂獄賊誣平民於官後乃擒
獲者有市他人所獲為己擒獲者夫賞當功則臣
下勸罰當罪則姦邪息此屬雖給朝廷得官然衆
耳目不可塗也臣恐天下皆然宜令公廉御史究
之削其冒陞之職重置于法則奔競之路塞公正
之門開人人務立實功矣都察院議宜行敬言于
天下從之○日生背氣一道色青赤夜月生五色
雲暈色鮮明○己亥書復襄王瞻塏曰承喻欲製

衮冕皮弁冠服今選新材皆足所用之度令人齎
回從府中自製庶幾適宜其王圭旒球玉珮金事
件宜就元用者不必改為惟叔亮之○賜周府汝
陽王有燭庶第二子名曰子垌庶第三子曰子壕
庶第四子曰子坊鎮平王有曠庶長子曰子堉庶
第二子曰子墾○庚子應城伯孫傑母蘇氏卒遣
官致祭命有司治喪葬○工部奏長淮衛城自正
統二年為淮水所決欲遷未果但令脩築今衛官
又以工程浩大為言宜令俟農暇修築仍戒其毋
擾軍毋緩事從之○辛丑鎮守陝西都督同知鄭

銘奏阿剌谷等簇負馬一千七百餘疋俱貧乏無
徵况在赦例乞為蠲免從之○湖廣都司奏枝江
守禦千戶所城自永樂初令荊州三衛及夷陵千
戶所協力修砌後以京師營造其役遂止然係邊
城不可隳廢事下工部請仍令原設修衛所終其
役從之○少師兼工部尚書吳中言臣寢疾經年
蒙恩仍給俸祿賞賚駢蕃臣感恩無極柰病日益
深徒妨賢路乞別銓選尚書以總部事

上曰中文效勞績仍優以俸尚書員闕吏部其擇人
以聞○壬寅鎮守洮州都督僉事李達老疾以其

子璵代為洮州衛指揮使○總督雲南軍務兵部尚書兼大理寺卿王驥等奏臣等遣雲南臨安衛指揮使萬城等捕反寇常郎羅攻克其寨賊潰散獲其妻孥族屬數人郎羅竄安南安南國王黎麟遣兵擒之檻至城營而斃餘黨四千餘人悉從招撫復業○癸卯賜秦府鎮國將軍志埜夫人柴氏誥命冠服等件○建宗人府吏部戶部兵部工部鴻臚寺欽天監太醫院於大明門之東翰林院於長安左門之東初各衙門自永樂間皆因舊官舍為之散處無序至是

上以宮殿成命即其餘工以序營建悉如南京之制其地有民居妨礙者悉徙之○甲辰廣西萬承州官族許永迪結倫州官族馮堅等貴州金筑安撫司頭目何先等來朝貢馬賜綵幣等物有差○陞遼東定遼右衛等指揮使范榮周能文廣為都指揮僉事指揮僉事周瑛李芳管安署都指揮僉事緣邊備禦從總兵官都督僉事曹義推舉也○命故遼東都指揮同知鄒溶子光襲為定遼後衛指揮同知陝西都指揮同知劉福子清代為西安後衛指揮同知遼東都指揮僉事劉斌子瑛代為寧

遠衛指揮使中都留守司都指揮僉事徐震子慶
代為皇陵衛指揮使山東都指揮僉事高源子昇
代為平山衛指揮僉事○陽武侯薛詵妻夫人陳
氏卒遣官賜祭命有司治喪葬○裁省湖廣漢陽
府同知通判知事檢校各一員從漢陽縣主簿陶
善奏其事簡故也○乙巳命故洮州衛廣福寺普
緣禪師道嚴姪完卜朶只巴襲職○丙午設南京
京衛武學從監察御史彭最言也○巡按福建監
察御史鄭顥奏臣奉勅會同三司親詣龍溪縣勘
得龍門山六十一戶已移居附郭地方撥與田地

三十餘頃以海門社巡檢司遷於青浦山其原報
衝塌畝數就令本縣豁除從之○丁未靖江王府
奉國將軍佐禮奏凡遇進表迎詔闕人隨從

上命廣西布政按察二司以儀從十人給之○免河
南開封等五府州縣去年災傷糧五十九萬一千
石有奇草六十一萬九千束有奇○命南京龍江
鹽倉檢校批驗所燒煎白鹽○戊申書復襄陵王
冲炆曰得奏府中闕內使訪得鳳翔府州縣民張
彪等六人俱有傷殘可備使令已令禮部移文所
司悉從叔祖取用但斯事

先朝明有禁令今念親親姑曲從之後不可違况切
近供事之人尤宜慎擇以防欺詐叔祖亮之○給
賜徐潘王鍾鐸歲祿本色六百石折鈔四百石○
金吾右衛卒樂馬駒言臣嘗請魔馬駒河石橋未
許然臣運石已備乞許卒其事從之○已酉命定
國公徐顯忠為正使給事中吳昇為副使持節封
晉憲王庶長子榆社王鍾鉉為晉王駙馬都尉井
源為正使給事中馬諒為副使持節封肅王庶長
子祿埤為洵陽王○河南布政司奏開封等府所
屬州縣蝗蝻生發傷害苗稼

上命即遣官督捕毋令殃民○庚戌起復陝西布政
使郭堅堅丁母喪去職

上以其練達老成深諳政體特命起復乘傳之任○
有祈福濟瀆廟得詩於水中者遠近爭傳誦之巡
撫少卿于謙奏事當杜漸防微往者妖賊張普祥
假佛法誑愚民倡亂今軍民祈福濟瀆歲以萬數
恐萌禍端遂收得詩者以聞

上是之令械其人赴京鞫治○壬子代世孫仕壘奏
本府承奉司缺印年久凡有事務行文未便乞照
例給賜

上如其請○淮王瞻墺奏永樂間蒙賜袞冕皮弁服
舄等今各短窄且漸有損壞乞重新給賜從之○
甲寅陞金吾右衛帶俸都指揮僉事錢貴為中軍
都督府都督同知○乙卯陞蔚州左衛指揮僉事
張斌署中都留守司都指揮僉事事○丙辰封方
山王美垣妹為垣曲郡主配王裕命裕為宗人府
儀賓賜誥命冠服等件并給歲祿○賜晉府徐滿
王鍾鐸冊印冠服儀仗○命故遼東都指揮僉事
吳誠子敬襲為指揮僉事羽林前衛指揮使尤勝
子斌襲父職中都留守司都指揮僉事趙斌子琮

代為指揮僉事遼東署都指揮僉事陳麒子理代
為指揮僉事金吾右衛指揮同知揚名子俊代職
○國子監丞汪賓以貪暴枷示監門賓欲諸監官
救已數以危言懼之祭酒李時勉恐賓誣陷無罪
具陳賓同前祭酒貝泰汚濫狀且言諸監官無如
賓之玷師儒者而自伏蒞任以來失舉奏罪

上雅知時勉廉正置不問而下所奏於法司賓獄具
謫戍威遠○丁巳賜淮王瞻墺嫡子名曰祁銓庶
長子曰祁鑛庶次子曰祁鉞○封汝陽王有燭庶
第二子子垞庶三子子壕庶第四子子坊鎮平王

有曠庶長子子瑛庶第二子子墾俱為鎮國將軍
以楊氏為子垌夫人薛氏為子壕夫人李氏為子
坊夫人石氏為子瑛夫人道氏為子墾夫人俱賜
誥命○四川建昌衛土官指揮使安均鹽井衛土
官千戶卜非廣西全茗州土官知州許式堅俱遣
人來朝貢馬賜綵幣等物有差○四川加木隆地
面番僧奴肉思長河西魚通寧遠宣慰司番僧刺
麻賈思巴藏卜等來朝貢馬及佛像瓔珞陝西河
州衛普應禪師刺麻領占遣人貢駝○禮部尚書
胡濙奏會同吏部尚書郭璉等揀選監生王槃等

二十八人年老不堪教養發原籍為民從之○命
給麓川凱旋將士沿途舟車廩餼勅總兵官定西
伯蔣貴總督軍務兵部尚書兼大理寺卿王驥等
曰卿等跋涉萬里効謀奮力平蠻寇靖邊方朕深
嘉念今凱旋在途特遣戶部右侍郎王質以羊酒
迎勞夏暑方殷其善撫士卒從容未歸用副朕意
○復除戶部主事邵珪曹昌辛泰於本部各司以
珪昌丁憂服闋泰剝員待次故也○戊午增置戶
部主事五員分督在京通州等衛倉廩收放糧斛
從戶部左侍郎李暹奏請也○命江西撫州府崇

仁縣縣丞潘原清復任陞正七品俸原清以九載
任滿部民保其勤於佐政乞留之巡按御史上其
狀故有是命○免山東濟南府等所屬州縣去年
災傷糧四十萬六千石有奇草三十萬九千九百
束有奇○己未封襄陵王冲炆庶長子範址庶第
二子範坳庶第三子範規庶第四子範墻俱為鎮
國將軍○勅鎮守陝西右副都御史陳鑑兼督陝
西歲運稅糧及河渠提舉司并各處倉場收支糧
草以鑑自陳前勅不及故從其請如王翱例勅之
○鎮守洮州都指揮僉事李信率所部徵茶馬受

